

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(XXIII)11

**SOALAN BERTULIS OLEH AHLI KAWASAN SUNGAI BAKAP
YB. DR. AMAR PRITPAL BIN ABDULLAH**

11. Berkenaan dengan kemajuan penternakan dan pertanian di Pulau Pinang.

- (a) Apakah rancangan dan langkah pihak Kerajaan Negeri dalam hal ini?

**YB. DR. AFIF BIN BAHARDIN
MENJAWAB BAGI PIHAK Y.A.B. KETUA MENTERI**

11. Kerajaan Negeri sentiasa prihatin terhadap kemajuan penternakan dan pertanian di Pulau Pinang.

Untuk sektor penternakan, Kerajaan Negeri melalui Jabatan Perkhidmatan Veterinar Negeri Pulau Pinang telah melaksanakan langkah-langkah seperti berikut:

- (i) Pelaksanaan program penternakan melalui Bajet Pembangunan setiap tahun seperti pembangunan industri ruminan, perkhidmatan regulatori veterinar, rancangan pembangunan perkhidmatan sokongan penternak, pembangunan industri nilai tinggi, pengawalan pencemaran veterinar, penternakan unggas, program kesihatan dan kebajikan haiwan dan perkhidmatan rawatan klinik dan ambulatori;

- (ii) Perancangan untuk menaik taraf sistem-sistem penternakan reban terbuka kepada penternakan secara reban tertutup bagi penternakan unggas dan khinzir. Pelaksanaan sistem ini akan meningkatkan kualiti penternakan komersil dan tidak menyebabkan pencemaran persekitaran;
- (iii) Transformasi usahawan ternakan kepada penternakan berskala besar (komersil) yang berdaya maju dan boleh bersaing di bidang usaha lain, dapat merasionalkan guna tanah yang terhad dan berteknologi tinggi;
- (iv) Menyediakan perkhidmatan veterinar yang cekap dengan mempergiatkan pengeluaran daging, telur dan susu di peringkat domestik bagi menentukan bekalan mencukupi dan konsisten bagi bahan-bahan mentah untuk keperluan industri pemprosesan makanan; dan
- (v) Mengambil langkah proaktif dalam menguruskan Bahagian Kesihatan Veterinar bagi menangani ancaman wabak penyakit dan penyakit zoonotik bagi menjamin industri ternakan bebas daripada sebarang ancaman wabak penyakit pada masa hadapan.

Bagi sektor pertanian pula, Jabatan Pertanian Negeri sentiasa berusaha untuk membantu para petani bagi meningkatkan hasil dan kualiti produk pertanian dengan penggunaan teknologi pertanian moden dan melalui penyampaian perkhidmatan pengembangan pertanian. Buat masa kini, pihak Jabatan Pertanian Negeri sedang berusaha untuk meningkatkan hasil pengeluaran padi daripada 5.8 metrik tan per hektar kepada 7.0 metrik tan per hektar dalam tempoh dua tahun akan datang. Selain itu, bagi tanaman selain tanaman padi iaitu buah-buahan dan sayur-sayuran, peningkatan sebanyak 10% disasarkan bagi setiap tahun.

Kerajaan Negeri melalui Jabatan Pertanian Negeri juga komited untuk membantu para pengusaha sektor pertanian agar dapat menggunakan keluasan tanah sedia ada secara optimum untuk meningkatkan produktiviti pengeluaran. Antara inisiatif yang dilaksanakan adalah:

- (i) Menggalakkan penggunaan teknologi pertanian terkini dan moden yang memerlukan keluasan tanah yang minima sebagai contoh teknologi fertigasi dan *nutrient film technique* (NFT);
- (ii) Melaksanakan Amalan Pertanian Baik (APB) dalam pengurusan kebun dan ladang yang memberipenekanan kepada pemeliharaan alam sekitar, keselamatan dan kebajikan pekerja, dan memastikan kualiti produk pertanian supaya selamat dimakan melalui penyertaan dalam Skim Pensijilan Amalan Pertanian Baik (myGAP) atau Skim Pensijilan Organic Malaysia (myOrganic); dan
- (iii) Memberi khidmat nasihat dan perkhidmatan pengembangan dalam amalan agronomi yang baik sebagai contoh dalam pemilihan bahan tanaman dan benih tanaman, pengurusan ladang dan membantu dari aspek pemasaran dengan kerjasama jabatan/agensi lain di Kementerian Pertanian dan Industri Asas Tani (MOA).